

## خديجة - الحلقة 1

كان ياما كان .... و ما يجلي الكلام غير بذكر النبي عليه الصلاة و السلام

(الولاد الحلوين يقولوا إيه ؟) عليه الصلاة و السلام ممتازين

طبعا كلنا فاكرين قصة سيدنا محمد... اللي ربنا اختاره عشان يعلمنا الصبح و الغلط  
.... و الحلال و الحرام. وعلشان يعلمنا الأعمال الطيبة و الأخلاق الجميلة. و يعلمنا  
دينا الإسلام ....

واللي هيحب سيدنا محمد و يسمع الكلام اللي ربنا علمه لسيدنا محمد ... ربنا  
هيحبه .... و هيدخله الجنة.

فاكرين وإحنا بنحكي قصة سيدنا محمد قلنا مين أكثر واحدة مؤدبة وطيبة وأخلاقها  
جميلة وكان عندها فلوس كتير

عرفتو مين هي؟؟ ها يا حلوووين مين اللي عرف هي مين؟؟

طيب هسهلها لكم هي قالت إن سيدنا محمد أحسن واحد هتديله فلوسها علشان  
يروح يشتري ويبيع لها حاجات في الشام علشان فلوسها تزيد أكثر وسيدنا محمد وافق  
ورجع من الشام وهو معاه فلوس كتير اوي وإداها ليها

ها مين أفكر هي ميبين؟؟

طيب هسهلها لكم اكثر من كده شويه كمان

هي اللي قالت ان سيدنا محمد أكثر إنسان أمين وهو أحسن إنسان يكون لها زوج

وسيدنا محمد وافق إنه يتجوزها لأنها أكثر واحدة مؤدبة وطيبة وأخلاقها جميلة

أكيد حبايبي الحلوووين عرفو مين هي 😊

صح براقوووا 🙌🙌🙌

هي السيدة **خديجة** وهي دي **أول زوجة** لسيدنا محمد

وهي أم أولاد وبنات سيدنا محمد فاكرينهم هما مين ولادهم؟؟

برافو على الشاطرين هما

**القاسم وزينب ورقية وأم كلثوم وفاطمة وعبد الله**

وطبعاً فاكرين مين اللي ماتوا من أولادهم ها ميبين؟؟

صح **القاسم وعبد الله** ماتوا وهما لِسَّه صُغِيرِين

وهي كمان كانت بتبعت الأكل لسيدنا محمد في الغار

مين الشاطر اللي هيقول اسمه غار إيه

صح برافو  **غار حراء**

وهي اللي جري عليها سيدنا محمد وهو خايف لما جاله سيدنا **جبريل** والسيدة **خديجة**

غطته ونشفت عرقه

ولما حكى لها سيدنا محمد اللي حصل له في الغار طمنته وقالتلو متخفش ربنا مش

هيخلي أي حاجة وحشة تحصل لك

فاكرين قالت لسيدنا محمد ليه مفيش حاجة وحشة هتحصله

يلا يا شاطرين مين اللي هيقول قالت إيه؟؟

صح مش هيحصله حاجة وحشة

لأنه بيقول الصدق دائماً

ولأنه طيب مع كل قرايبه وبيهتم بيهم

ولأنه بيحب الفقرا وبيعطف عليهم

ولأنه دايماً أخلاقه حلوة

ولأنه بيكرم الضيوف

ولأنه بيساعد أي حد عنده مشكلة

**علشان كده ربنا بيحميه**

ولو إحنا كمان عملنا كده ربنا هيحمينا ومش هيخلي أي حاجة وحشة تحصل لنا

وبعد كده السيدة **خديجة** أخذت سيدنا محمد وراحت لابن عمها اسمه إيه؟؟

صح براقو على الحلوين اسمه **ورقة بن نوفل**

يبقى مين بقى أول واحدة آمنت بسيدنا محمد وسمعت كلامه؟؟

السيدة **خديجة** ممتازيين

وهي فضلت مع سيدنا محمد في شعب أبي طالب ٣ سنين من غير أكل ولا شرب

كويس وكانو بيحبوا الأكل بصعوبة لغاية ما جسمها ضعف

وقالت إحنا مش هيهمنا مهما الكفار يعملوا هنفضل نحب ربنا ونعبد ربنا عشان

ندخل الجنة

اللي فيها أحلى أكل وأحلى شرب

وهي دايما كانت بتدافع عن سيدنا محمد وبتحبه

وبتقول دائما للنبي إن ربنا إختارك وهيخليك تكسب في الآخر

وسيدنا محمد كان يبحبها أوي

وهي أول واحدة صدقت الرسول وآمنت به

هي أول ست آمنت بالرسول

ده كل اللي إحنا حكينا عنه قبل كده

إيه رأيكم نعرف حاجات أكثر عن أول زوجة للرسول

بس أكيد مش دلوقتي علشان وقت النوم جه

الخلوين هيقولوا لماما تصبحي على خير

واللي هيسمع كلام ماما هنكمل معاه الحلقة الثانية إن شاء الله

**وصل اللهم وسلم على سيدنا محمد**

## خديجة - الحلقة 2

كان ياما كان و مايجلي الكلام

إلا بذكر النبي .... محمد عليه الصلاة و السلام

وأولادي اللي بيحبوا سيدنا محمد أكثر واحد في الدنيا كلها ..

لأنه بيعلمهم كل الخير و بيعرفهم إزاي يكونوا في أحسن مكان ... جنة ربنا

هيقولوا بأحلي صوت :

اللهم صلي علي سيدنا محمد

و دلوقتي هنتعرف مع بعض على السيدة خديجة

و دي أكثر زوجه كان بيعبها الرسول صل الله عليه وسلم

السيدة خديجة كانت عايشه في مكه مع باباها خويلد بن اسد قبل ما تتجوز الرسول

بيتها كان واسع أوي و كبير وحلو أوي

و الناس المهمين كلهم كانوا دائما يبيزوروا باباها لأنه كان من أكثر الناس اللي بتعرف  
تتصرف وتساعد الناس وتحل مشاكلهم

و بيتها ده كان قدام **الكعبة** علطول

والسيدة **خديجة** كانت بنت جميلة و زكية اوي و بتحب الهزار و كمان كانت شاطره  
اوي في اللغة العربيه وبتحب الشعر والشعر ده كلام بنكتبه واللي بيسمعه بيتبسط  
علشان كل الكلام بيبقى آخره نفس الكلمة أو الحرف

و هي كمان كانت قلبها طيب و اي حد بيشوفها كان بيتعلق بيها علطول لانها  
كانت دائماً بتعطف على الناس و تعاملهم كويس سواء كانوا فقراء او اغنياء  
و ده كان عكس اللي الناس كانت بتعمله في الوقت ده

كان اي حد غني كان بيبقى متكبر و مش بيعب الناس و مش بيعب الفقرا  
ويعاملهم وحش

و هي كانت بتساعد باباها اللي كان بيحل مشاكل الناس اللي حواليه

و هي كانت هاديه قوي و دائما تقول **الحمد لله** علي نعم ربنا عليا

علشان هي كانت عارفه ان مساعده المحتاج ده جزء من شكر ربنا

وربنا قال لو شكرتم هزيدكم

**"لئن شكرتم لأزيدنكم"**

و باباها لما لقاهها إنسانه كويسه و طيبه فرح بيها قوي و بقى يخليها تحل مشاكل

الناس معاه علشان حس انها ذكيه

في الوقت ده الناس في مكه مكنتش بتحب البنات

و في منهم ناس كانوا بيدفنوا البنات و هما عايشين وكانوا بيسموا الموضوع ده **وأد**

### **البنات**

و لما كبرت السيده خديجه و بقت شابه جميله اتقدملها شباب كثير قوي اغنيا و

اذكيا و ناجحين في شغلهم لكن هي كانت دائما بترفض

لأن باباها كان دائما يقول لها أهم حاجة يكون الزوج صالح وأخلاقه كويسة  
فكانت بتتهم هي بشغل البيت وسابت باباها يدور لها على زوج صالح  
يعني إيه **زوج صالح**؟؟ يعني طيب وممكن نعتمد عليه في كل حاجة وكريم وبيفكر  
بعقله قبل ما يتصرف

وفي يوم من الأيام مامت السيدة **خديجة** واسمها **فاطمة** وباباها جابوا لها عريس  
والعريس ده كان تاجر شاطر أوي يعني بيشتري وبيبيع وكمان بيكسب فلوس كتير  
أوي وكان فيه كل الحاجات الحلوة يعني طيب وكريم وعاقل ويعتمد عليه

وكان اسمه **عتيق بن عابد**

وباباها ومامتها قالوا لها فكري كويس وبعدين ردي علينا

ودي كانت حاجة غريبة برده في مكة لأنهم كانوا بيحوزوا البنات من غير ما ياخدوا  
رأيهم

فهي ردت وقالت لو حضرتك يا بابا موافق عليه أنت وماما أنا كمان موافقة

وعملوا فرح كبير للسيدة **خديجة** واتجوزت **عتيق**

وعاشوا مع بعض في سعادة وكانوا مبسوطين

وفاتت سنة على جوازهم

ورينا رزقهم بنت حلوة تشبه مامتها بالضبط

لكن حصلت حاجة خلت السيدة خديجة تزعل أوي

يا ترى حصل إيه؟؟

هنعرف بكرة إن شاء الله إيه اللي خلى السيدة **خديجة** تزعل

ودلوقتي تصبحوا على خير يا حلوين

**اللهم صل وسلم على سيدنا محمد**